

Йоскалык библиотекаын

# Зарни шыкысысь нуныкай

## Мар пыре Удмурт Республикалэн печатъя архиваз?

Удмуртиысь культура удысысь дано ужась, Йоскалык библиотекаысь «Книга палата» ёзысьтыз валтйсь библиотекарь Надежда ЛИМОНОВА котькуд потэм выль книгаез синйылтыны но сое лыдзиськонилэн шыкысаз пыртыны тырше.

— Надежда Петровна, маин выре «Книга палата»?

— Совето Союзлэн Культура министрствоез 1958-тй арын ай республикаосысь библиотекаосты косйз шаерын потйсь книгаосты, газет-журналёсты регистрировать карыны. Со аспортэмлыко шыкыс выллем, кытчы вань потйсь книгаослэн (газет-журналёслэн) 1 экземплярзы одно ик вуыны кулэ. Библиотекарьёс республикаысьтым издабельёслэсь но авторёслэсь печатлам ужёссэс гождяса люкаса кельто. «Книга палата» ужа, Россиын кутэм «Об обязательном экземпляре» закон вылэ пыкъяськыса. Та выллем ик закон кутэмын вал Удмурт Элькунын 2017-тй арын. Соя Удмуртын котькуд поттэм изданиез: печатлам книгаез, газет-журналэз, электрон но аудио амалэн лэсьтэмзэ но — 16 экземплярэн келяно Москвае — Россиысь Книжной палатае, нош 3-зэ — Удмуртиысь Национальной библиотекае. Издательствоос но авторёс ужзэс Москвае ыстыны тыршо ик ай, нош Йоскалык библиотекаямы куддыр сётэмзы уг поты. Дорамы лыктйсь 3 экземпляр пöлысь 2-ез интыяське лыдзисьёсын ужась шаертонъя отделэ, 1-ез — ми доры, «Книжной палатае», мукет сямен со нимаське Удмурт Республикалэн печатъя архивез. Татысь каталогешедем бичет даурёсын утиське, сое списать карыны уг яра.

— Удмуртилэн печатъя архивез узыр-а?

— Туннэ нуналлы «Книга палаталэн» фондаз утисько 447 сюрс 207 экземпляр документёс, 1920-тй арысен кутскыса печатлам ужёс — книгаос, газет-журналёс, суредёсын но ногаосын поттэм бичетёс (соос удмурт, зуч но мукет кыльёсын печатламын). Паймымон узыр коллекцимы плакатёсын, афишаосын,



Надежда Лимоноваэн архивысьтыз

Россиысь библиотекаослэн ассоциацизы Надежда Лимоноваез пусйиз библиотечной шаертонэз азинтэмез понна Данъян грамотаен. Сое зечкылазы Йоскалык библиотекалэн кивалтйсьез Татьяна Тензина но культура министр Владимир Соловьёв.

буклетёсын, дырпусёсын (календарь). Ар чоже ми доры интыясько 1 сюрс пала книгаос но справочникёс, 90 пала газетёс, 35 пумо журналёс.

— Надежда Петровна, Йоскалык библиотекаын ужамдылы туэ 30 ар тырмиз ни, кыче книгаосты тужгес но чем юало лыдзисьёс?

— Берло арёсы тросэзлэн тодэмзы потэ асьсэ выжызэс: кытысь потэмьин, кин вал вашкала чыжы-выжызы. Соин ик чем юало элькунмылэн историезлы, гуртёслы но районёслы сйзем книгаосты. Котьку трос тунсыкъяськисьёс этнографиен, кылтодонэн, литературоведениен. Книга куремья валаны луэ, кыче лыдпус яке ужрад матысь дыре вуэ: я Вормон Нунал, Удмурт Элькунлэн вордскем нуналэз, я кыче ке фестивалёс, чошатсконёс, конкурсьёс. Нош вашкала учебникёсын жажыосмы воксё бушаны одъяло ке, валаськом: та дыре ортчо соослы сйзем занятиос, кудёссэ нуэ Удмурт кун университетысь тодосчи Татьяна Зайцева. Туэ, шуом, тужгес юано книгаос пöлы пыризы таёосыз: «Многонациональная сценическая культура Удмуртии», «Удмуртская Республика. Здравоохранение» энциклопедиос, Николай Пислегин — «Населённые пункты Удмуртского Прикамья

XVII — середины XIX в.» но «Туала удмурт проза» антология.

— Нош тйляд асьтэлы тужгес дуноез книгады татын вань-а?

— Та юан мон понна тужгес секытэз! Шуом, 100 ар талэсь азыло потэм книгаос но кызызы верантэм шунтйсь арбериос кадь поты. Ваньзы! Нош туэ книга потэ ке, авторлы гинэ өвёл, милемлы но со пинал ваем кадь, со «нуныкайлэн» киросанаез кадь асьмелы потйськом. Нош быгатоз-а анай вераны, кудйз нуныкаез самой дуно но зеч?!

— Луэ-а озы: лыдзись алигес потэм книга сярысь юа, нош со библиотекаын өвёл на.

— Луэ. Сыче дыръя мылкыдмы куашка. Малы ке шуоно мукет дыръя та лыдзись дорамы, оло, уз но лыкты ни. Жож луэ сыче авторёс понна но, кудёсыз уг сюлмасько

Удмуртиын поттэм изданиослэсь 16 экземплярзэс келяно Россиысь «Книжной палатае», 3-зэ — асьме Йоскалык библиотекае.

книгаоссэс Йоскалык библиотекалэн фондаз сётыны. Нялтас вераса, трос книгаослэсь пытызэс утчано луэ. Выль книга потйз шуыса, кытысь ке ивор тодйськом, бичетлэсь

«анай-атайзэ» — утчаськом. Шедьтйськом ке, йыбыртйськом, книгазэс дорамы мед ваёзы шуыса. Тросэз шумпотыса кузьмало, кудогёсыз 1 экземпляр мырдэм сёто, нош кин ке вузаны гинэ соглаш луэ. Милемлы обязательной экземпляр басыны коньдон уг висьяськы.

— Шаерысьтым издательствоосын кусыпёсты та ласянь зечесь-а?

— Вань «отличникёсмы» — «Удмуртия» но «Иднакар» книгапоттонниос. Соослэсь вань поттэм бичетёссэс шедьтыны луэ библиотекамылэн фондэсыз. Озы ик быдэн 3 экземплярэн поттэм ужёссэс висьяло Дышетонэз азинтонъя институт, Ижысь гурт удысья кун академия, Глазкарысь педагогика кун институт, шумпоттэ зол монографиосыныз История, кыля но литература Удмурт институт. Огкыл шедьтыны быгатймы Удмурт кун

университетэн но Ижысь техника кун университетэн, Ижысь медицина кун академиен. «Маршак», «Удмуртский издательский дом» но «Шелест» издательствоос

быдэн 2 экземпляр келяло. Нош «Алкид», «Монпоражён», «Эрго», «Книгоград» частной издательствоос милемын уг эшъясько. Татын поттэм книгаос фондамы вуозы шуыса оскон — авторезлы гинэ. Кудог изданиос вуо ик Глазовысь но Сарапулысь типографиосысь, нош Воткинск но Можга курыса но номырзэс уг ысто. Ёросьёсысь газет редакциос берло дыре печатланы одъязы асьсэ авторёссылэсь книгаоссэс, таё бичетёс арысь аре поты. Нош книгаосы лыдзись доры вуо (милем фондамы) авторёслэн мылкыд каремзы гинэ.

— Азыло но туалалыдзисьёс зол висьясько-а?

— Висьясько. Азыло арёсы лыдзись лыктэ вал иворёс шедьтыны, со яратэ вал каталогёсын ужаны, трос материалёсын тодматскыны. Туала лыдзисьлы кулэ конкретика — пунктэм юанэзлы соку ик вакчияк валэктон мед шедьтоз. Туала лыдзисьлэн юанэзлы сётоно дась ответэн статья яке книга. Аслаз утчаськемез чем дыръя уг поты. Со уг чида читальной залёсын пукыны, со яратэ книга-газет-журнал лыдзыны НЭБ-ысь — Национальной электрон библиотекаысь (пунктэмын Йоскалык библиотекамылэн сайтаз).

— Мар сйзысалды лыдзисьёслы но авторёслы?

— Авторёсмылы (писательлёслы) — творческой мылкыдды ноку но медаз сйя, туннэ книгадэс лыдзисьёслэн лыдзы ичигес шуыса. Гожъялэ, узырмытэ библиотекалэсь зарни шыкысэ — со быдэс элькунмылэн культура, литература узырлыкес. Уката ик ми табере ужаськом выльдэм библиотекаын. Со туалал курунёсты чакласа лэсьтэмын бере, книгаостэс даурёс чоже утыны вань луонлыкёс кылдытэмын. Лыдзисьёсмылы сйзем потэ: котькудды мед шедьтоды асьтэлэсь Книгадэс, библиотека улондэс тунсыкогес, яркытгес, капчигес но югытгес карыны мед быгатоз. Тй татын вань юанёстылы валэктон мед шедьтоды! Нош ми, библиотекаын тыршисьёс, быгатэммыя юрттомы.